

# RI UXLABIXEL

Tok ri Adán y ri Eva e elenek chic el chupan ri Cotz'ijbel rubini'an Edén, xquichop rusamajixic ri ulef richin queri' niqich'ec ri quic'aslen. Xec'oje' c'a ri calc'ual. E janíla ri calc'ual xe'alex pe quiq'uin. C'a c'ari', ri calc'ual xec'ule', y chuka' xec'oje' ri calc'ual rije' (tatz'eta' c'a ri Moisés 5:1-3). Que c'ari', ri calc'ual ri Chicajel Katata' xe'el c'a el riq'uin rija' y xeka' pe vave' chuech re ruvach'ulef achi'el ri rusujun can rija' chique. Tok xepe vave', xquimestaj ri quic'aslen riq'uin ri Tata'ixel. Man riq'uin vi ri', ri Tata'ixel man xerumestaj ta rije'. Xa xutek pe ri Uxlabixel chiquito'ic y chuka' chiquiyukexic.

Tabixaj c'a ri bix rubini'an "Nata'".

Tasiq'uij c'a ri ruca'n tanaj richin ri bix ri'.

## ¿ACHIQUE ROMA XAPON RI UXLABIXEL RIQ'UIN RI ADAN?

Ri Adán y ri Eva xech'o ak'anij riq'uin ri Chicajel Katata'. C'a c'ari', rija' xch'o pe quiq'uin rije' y xuya' jujun pixa' chique (tatz'eta' c'a ri Moisés 5:4-5). Ri Adán xerutakej ri pixa' ri'. Jun ángel richin ri Ajaf xapon quiq'uin ri Adán y ri Eva, y xerutijoj chire ri rubeyal richin ri colotajic. C'a c'ari', ri Ajaf xutek pe ri Uxlabixel chuk'alajirisaxic ri Tata'ixel y ri C'ajolaxel chiquivech ri Adán y ri Eva, y chiquitijoj chire ri utzilej rutzijol (tatz'eta' c'a ri Moisés 5:9). Riq'uin ri ruchuk'a' ri Uxlabixel, ri Adán xuchop ruya'ic lo-k'olej rutzijol, y quere' xubij: Nim ruva ruk'ij ri rubi' ri Dios. Roma tok xink'ej ri pixa', xejekatej chic ri runak' nuvech. Y chupan re c'aslen re' yin xquiquicot, y riq'uin ri nuch'acul xtintz'et chic ri Dios (Moisés 5:10). Roma xubij ri Uxlabixel chire ri Eva pa ránima, rija' quere' xubij: Vi man ta xkak'ej ri pixa', man ta jun bey xec'oje' ri kijatzul. Y man

ta xketamaj achique ri utz y achique ri itzel. Chuka' man ta xketamaj ruvech ri quicoten richin ri kacolotajic, ni ta chuka' ri c'aslen richin jumul ri nuya' ri Dios chique checonojel ri yeniman rutzij (Moisés 5:11).

Tasiq'uij ruvech ri Moisés 5:4-11. Ri' nitzijox chi ri Uxlabixel xapon quiq'uin ri Adán y ri Eva.

Catzijon c'a juba' chirij achique roma nic'atzin chi ri Uxlabixel xapon quiq'uin rije'.

### ¿ACHIQUE CAMI RI UXLABIXEL?

Ri Uxlabixel jun chique ri Oxlok'olaxela' (tatz'eta' c'a ri 1 Juan 5:7 y chuka' ri DyC 20:28). Ri ruch'acul rija' xa uxlabel rubaniquil. Ri ruch'acul nitzu'un junan riq'uin jun ruch'acul jun achin (tatz'eta' c'a ri DyC 130:22). Rija' c'o chupan xa jun c'ojlilbel chupan jun ramaj. Pero ri ruc'ojlemal rija' c'o modo nic'oje' c'a chuvech chijun re ruvach'u-lef.

Ri Tata'ixel, ri C'ajolaxel, y ri Uxlabixel quibini'an ri Oxlok'olaxela' (Trinidad). Junan chi utzil ri quirayibal rije'. Chiquijunal rije' c'o quisamaj richin niquinuc' ri colotajic quichin ri vinaki'. Ri Tata'ixel ja rija' ri katata' y ri oj takayon. Ri C'ajolaxel ja rija' ri Kacolonel. Ri Uxlabixel, ja rija' ri k'alajirisanel y ri jiquibanel richin ronojel ri kitzij.

Ri Uxlabixel jun nimalej tako'n richin ri Tata'ixel. Rija' jun jebel sipanic ri niya'ox chike roj. Chupan ri tanaj 21, nitzijox achique rubeyal richin nikac'ul ri Uxlabixel.

Tasiq'uij c'a ruvech ri DyC 130:22. Catzijon c'a chirij ri achique rucojolil ri rubaniquil ri Uxlabixel riq'uin ri quibaniquil ri Tata'ixel y ri C'ajolaxel.

¿Achique roma tok xa uxlabel rubaniquil ri Uxlabixel?

¿Achique rubeyal richin e junan ri Tata'ixel y ri C'ajolaxel y ri Uxlabixel? Ri' xa junan juba' riq'uin jun familia. Ri te'ej, ri tata'aj, y ac'uala', checonojel junan yesamej y junan niquito' qui'.

¿Achique modo nitquir nic'oje' c'a ri ruc'ojlemal ri Uxlabixel chupan jalajoj ruvech c'ojlilbel chupan ri mismo momento? C'o c'a modo richin nijunumex juba' ri Uxlabixel riq'uin ri k'ij. Xaxe c'o jun k'ij chila' chicaj, pero nuya' rusakil y ruchuk'a' chike roj konojel chupan ri mismo momento.

### ¿ACHIQUE ROMA NIC'ATZIN RI UXLABIXEL?

Ri rusamaj ri Uxlabixel richin nuk'alajirisaj ri Tata'ixel y ri C'ajolaxel pa kánima ri vinek. Rija' chuka' nuk'alajirisaj achique ri kitzij richin ronojel.

Ri Uxlabixel nubij chike pa kánima chi ri Jesucristo ja rija' ri Kacolonel y ri Kajaf (tatz'eta' c'a ri 3 Nefi 28:11 y ri DyC 20:27 y ri Hebreos 10:15). Rija' nuk'alajirisaj pa kánima chi ri Tata'ixel can ja vi rija' ri rutata' ri kuxlabel. Ri Uxlabixel yojruto' richin queri' nik'ax c'a chikavech chi c'o jun rubeyal achojroma xkojoc na junan riq'uin ri Tata'ixel

(tatz'eta' ri Romanos 8:16-17). Ri profeta'i' richin ri Ajaf quibin can quere': "Roma c'a ri ruchuk'a' ri Uxlabixel, c'o banel richin xtivetamaj ronojel ri kitzij'" (tatz'eta' c'a ri Moroni 10:5-7).

Vi ta manek ri Uxlabixel, xa manjun bey niketamaj chi ja ri Jesucristo ri Kacolonel. Can ja vi ri Colonel xubij quere': "Manjun nitiquir nibin chi ja ri Jesús ri Ajaf, vi ta man roma ri Uxlabixel" (1 Corintios 12:3). "Ja c'are' ri c'aslen jumul, chi tiquetamaj avech ayon rat ri Dios kitzij, y chuka' ri Jesucristo ri a takon pe" (Juan 17:3). Roma ri ruchuk'a' ri Uxlabixel tok yojyukex richin niketamaj ri utzilej rutzijol richin ri Jesucristo y nikanimaj.

Ri ruchuk'a' ri Uxlabixel janíla chi nim. Tok rija' nich'o kiquin pa kánima, manjun chic ca'i' kac'u'x. Xa can keta-man chi kitzij ri nubij chike. Ri Presidente Joseph Fielding Smith quere' xubij: "Tok ri Uxlabixel nik'alajirisan pa ránima jun vinek, niyatej can jun retal pa ránima ri man xtisilon ta. Ri retal ri' can c'ayef vi richin niyojtej el. Ri Uxlabixel nich'o riq'uin ri ruxlabal ri vinek, y can nim vi ri ruchuk'a'. Jun k'alajirisanic richin jun ángel o can richin Ruc'ajol ri Dios, xtuya' can jun retal pa runak' ruvech jun vinek y chupan ri runojibal. C'a c'ari', ri retal ri' xtiyojtej ekal ekal. Jac'a ri retal ri nuya' can ri Uxlabixel noc ka c'anej chupan ri ránima jun vinek y can janíla vi c'ayef richin niyojtej el." Ri Presidente Smith xubij chuka' quere': "Roma ri Uxlabixel, netamatej ri kitzij chupan ruc'u'x ri ránima jun vinek, richin queri' manek modo xtimestex ta el."

Roj oj c'o chupan ri Ruk'ataj ri Jesucristo quichin ri Chojlaxela' chupan ri Ruq'uisibel tak K'ij. Romari', c'o c'a modo richin chi ri Uxlabixel yojruyukej y richin nuk'alajirisaj ri kitzij chikavech. Nic'atzin chi nikaben chi roj oj ruc'amon richin nikac'ul re nimalej tako'n re' ri nuk'alajirisaj chikavech roj ri Chicajel Katata' y chuka' ri Jesucristo.

¿Achi que roma nic'atzin ri Uxlabixel chike roj? Tasiq'uij chic jun bey ri achique xubij ri Presidente Joseph Fielding Smith.

Tac'utuj c'a chique ri ch'aka' chic vinaki' chi tiquibij achique ri xquina' tok ri Uxlabixel xuk'alajirisaj pa cánima chi can kitzij vi ri utzilej rutzijol.


Tabixaj c'a ri bix rubini'an "Ri Uxlabixel Achiel Jun K'ak'."

CH'AKA' CHIC MOCAJ RI UTZ YE'ANIC'OJ

Moisés 5 (ri rijatzul ri Adán)

2 Nefi 31:21 (nizijox achique ri Uxlabixel)

Juan 14:26 y ri Juan 15:26 y ri Juan 16:13 y ri Lucas 12:12 y ri DyC 8:2-3 y ri DyC 11:12-13 y chuka' ri DyC 20:26 (Ri Uxlabixel nucukuba' kac'u'x, yojrutijoj, nuk'alajirisaj ri Cristo, yojruyukej chupan ri kitzij, oj rachiblan, y ruc'u'an kabey)



# YOJCH'O RIQ'UIN RI CHICAJEL KATATA'

Quere' xubij ri Jesús: "C'o chi yixch'o ak'anij jutakel riq'uin ri Tata'ixel pa nubi' yin" (3 Nefi 18:19).

Ri lok'olej ch'oven riq'uin ri Dios jare' jun nimalej turusanic ri niyatej chike chuvech re ruvach'ulef re'. Riq'uin re lok'olej ch'oven re', c'o modo yojtzijon riq'uin ri Chicajel Kata-ta' k'ij k'ij y nikac'utuj chi yojruto'.

Tabixaj c'a ri bix rubini'an "¿La Xach'o Cami Riq'uin Dios?" y chuka' ri bix rubini'an "Kojxunque' Junan Konojel."

## ¿ACHIQUE CAMI RI CH'OVEN RIQ'UIN RI DIOS?

Ri lok'olej ch'oven riq'uin ri Dios jari' tok yojch'o riq'uin ri Dios y nikabij chire achique ri c'o pa kánima. Nikaben ri lok'olej ch'oven ri' can riq'uin vi ri Dios. Y man nikaya' ta ruk'ij jun chic achin, ni ta chuka' ruk'ij achique banatajinek roma jun chic achin o ri q'uiytisan ri Dios (tatz'eta' c'a ri Exodo 20:3-5).

## ¿ACHIQUE ROMA YOJCH'O AK'ANIJ RIQ'UIN RI DIOS?

Ri lok'olej ch'oven riq'uin ri Dios janíla nic'atzin chique ri vinaki' can pa rutiquiribal pe re ruvach'ulef. Jun ángel richin ri Ajaf xerupixabaj ri Adán y ri Eva chi titzolin c'a pe quic'u'x y quech'o ak'anij riq'uin ri Dios pa rubi' ri C'ajolaxel (tatz'eta' c'a ri Moisés 5:8). Ri pixa' ri' manjun bey elesan el chuvech re ruvach'ulef. Ri lok'olej ch'oven riq'uin ri Dios yojruto' richin nikanimaj ri Ajaf y richin nikaben chi utzil ri kasamaj chupan ri K'ataj. Ri lok'olej kach'oven riq'uin ri Dios nuben chi xaxe ri utz nikanojila', nikabanala', y nikabila'.

Nic'atzin c'a chi nikac'utuj chire ri Dios chi nuya' kuchuk'a' richin queri' nikaxilk'otij c'a ri Satanás y chuka' ri e

tzekelbeyon richin (tatz'eta' c'a ri 3 Nefi 18:15 y chuka' ri DyC 10:5). Nic'atzin chuka' chi yekak'alajirisaj ri kamac chuvech ri Dios y nikac'utuj chire chi querucuyu' ri kamac ri' (tatz'eta' c'a ri Alma 38:14).

Nic'atzin c'a chi nikac'utuj chire ri Ajaf chi xkojrUYUKEJ y xkojruto' chupan ri kac'aslen k'ij k'ij. Nic'atzin chi yojch'o ak'anij riq'uin ri Ajaf coma ri ka familia, y ri kachibil, y ri katico'n, y ri kachicopi', y ri kasamaj. Nikac'utuj chuka' chire ri Dios chi yojruchajij chiquivech ri yojquetzelaj (tatz'eta' c'a ri Alma 34:17-25).

Ruc'amon chi yojch'o ak'anij riq'uin ri Dios richin nikabij chire chi nikajo' rija'. Riq'uin c'a chuka' ri', xkojjel apon riq'uin rija'. Nic'atzin chi nikamatioxij chire ri Katata' roma ri rutzil kavech y roma ronojel ri nuya' chike k'ij k'ij (tatz'eta' c'a ri 1 Tesalonicenses 5:18). Nic'atzin c'a chi nikac'utuj chire ri Chicajel Katata' chi yeruya' ronojel ri nic'atzin chike richin nikatakej ri utzilej rutzijol vave' chuvech re ruvach'ulef.

Ruc'amon chi yojch'o ak'anij riq'uin ri Dios richin yojbiyin chupan ri chojilej bey ri oj ruc'uan, chupan ri c'aslen richin jumul. Nic'atzin chi man nikamestaj ta chi yojch'o xaxe riq'uin ri Dios, ri banayon richin ronojel ri chojmilal. Jari' nikaben richin queri' xaxe ri choj nikanojjila', nikabila', y nikabanala'.

¿AchiqUe modo xkojruto' ri lok'olej ch'oven richin xkojjel apon riq'uin ri Dios?

Tatzijoj c'a chique ri vinek achique ri xubanala' ri Daniel. (Jari' c'o chupan ri Daniel 6:1-23).

¿AchiqUe modo xch'o ak'anij ri Daniel riq'uin ri Dios?

¿La janfla caml c'atzinel chire ri Daniel ri lok'olej ch'oven riq'uin ri Dios?

## **¿JAMPE' NIC'ATZIN CHI YOJCH'O AK'ANIJ RIQ'UIN RI DIOS?**

Utz nikaben ri lok'olej ch'oven ronojel mul tok nikarayij yojtzijon riq'uin ri Dios. C'o modo yojch'o riq'uin rija' xaxe pa kanojjibal o chuka' riq'uin kach'abel. C'o bey re' nic'atzin chi yojc'oje' kayon oc richin queri' nikabij c'a chire ri Dios chironojel ri c'o pa kánima (tatz'eta' c'a ri Mateo 6:6). Utz chuka' yojch'o ak'anij riq'uin ri Dios pa kasamaj k'ij k'ij. Utz c'a nikaben jun lok'olej ch'oven riq'uin ri Dios chupan jun molojri'il, o pa kachoch. Utz chuka' vi oj c'o pa bey, o pa samaj, o vi tok manjani' tikatij kavay. C'o c'a modo yojch'o ak'anij riq'uin ri Dios ronojel mul tok roj

nikajo'. Utz nikaben ri lok'olej ch'oven nimak'a', pa k'ij, o chuka' chak'a'. C'o modo richin yojch'o ak'anij riq'uin ri Dios tok oj c'o kayon oc, o chuka' tok oj c'o quiq'uin ch'aka' chic vinek. C'atzinel chi c'o ri Chicajel Katata' chupan ri kanojibal benek ruvech (tatz'eta' c'a ri Alma 34:27).

C'o bey re' man can ta nikarayij yojch'o ak'anij riq'uin ri Dios. Riq'uin juba' c'o koyoval, o xa yojbison juba'. Ja c'ari' tok can janila vi nic'atzin chi nikatij kak'ij richin yojch'o ak'anij riq'uin ri Dios.

Nic'atzin chi yojch'o ak'anij riq'uin ri Dios kayon oc ronojel ak'a' y ronojel nimak'a'. Ri lok'olej tak tz'ibanic niquibij chi utz vi nibanatej ri lok'olej ch'oven nimak'a', pa k'ij, y chak'a' (Alma 34:21).

Ri Kajaval yojrupixabaj richin kojch'o ak'anij riq'uin ri ri Tata'ixel tok oj c'o quiq'uin ri ka familia, richin queri' xqueturusex chuka' rije' (3 Nefi 18:21). Ri achi'a' ri e uc'uayon kabey chupan ri K'ataj oj quipixaban chi tikabana' c'a jun lok'olej ch'oven riq'uin ri Dios junan quiq'uin ri ka familia ronojel k'ij y ronojel ak'a'.

Chuka' niyatej k'ij chike richin nikamatioxij chire ri Dios y nikac'utuj chire chi tuturusaj ri kavay tok yojva' k'ij k'ij.

Yojch'o ak'anij riq'uin ri Dios richin nikatiquiriba' ronojel ri molojri'il chupan ri K'ataj. Que c'ari' yekaq'uis ri molojri'il chuka'. Chiri' c'a nikamatioxij chire ri Dios roma ronojel achique ri nuya' chike. Chuka' nikac'utuj chire chi yojruto' richin queri' utz nikaya' ruk'ij rija'.

Tac'utuj c'a chire jun vinek chi tusiq'uij ri xubanala' ri Enos. (Jari' c'o chupan ri Enos 1-12).

¿Achique rubaniquil ri lok'olej ch'oven ri xuben ri Enos?

## **¿ACHIQUE MODO YOJCH'O AK'ANIJ RIQ'UIN RI DIOS?**

Ketaman chic chi c'o modo yojch'o riq'uin ri Dios xabacuchi' oj c'o vi. C'o modo nikaben ri lok'olej ch'oven pa kanojibal o riq'uin kach'abel. C'o c'a modo yojch'o ak'anij riq'uin tok oj pa'el o chuka' tok oj xucul. C'o c'a modo richin yojch'o ak'anij riq'uin ri Dios tok oj c'o kayon oc o tok oj c'o quiq'uin ch'aka' chic vinek. Xabachique rubaniquil ri lok'olej ch'oven riq'uin ri Dios, nic'atzin chi yojch'o riq'uin rija' riq'uin cukubabel c'u'x, jun choj kánima, y

jun kitzij karayibal (tatz'eta' c'a ri Moroni 10:4).

Tok yojch'o ak'anij riq'uin ri Dios, nic'atzin chi nikabij chire achique ri c'o pa kánima. Nic'atzin chi nikacukuba' kac'u'x riq'uin. Chuka' nikac'utuj chire chi yojrucuy. Nikamatioxij chire y nikabij chire chi nikajo'. Man utz ta vi janíla nikacamuluj ri katzij (tatz'eta' c'a ri Mateo 6:7-8). Nic'atzin chi nikac'utuj chire ri Tata'ixel chi tibanatej achique ri nurayij rija'. Jari' xa roma c'o bey re' ri achique nikarayij roj man ja ta ri' ri nic'atzin chike (tatz'eta' c'a ri 3 Nefi 18:20). Pa ruq'uisibel ri lok'olej ch'oven riq'uin ri Dios, nikatanaba' pa rubi' ri Jesucristo (tatz'eta' c'a ri 3 Nefi 18:19).

### **¿ACHIQUE MODO YOJTURUSEX TOK YOJCH'O RIQ'UIN RI DIOS?**

Tok yojch'o ak'anij riq'uin ri Dios riq'uin jun choj kánima, rija' can yojruturusaj vi. Riq'uin juba' c'o jantek ri Dios man nuben ta ri kac'utun chire. Jari' roma ri Dios retaman chi ri achique kac'utun xa man utz ta o man nic'atzin ta chike. C'o chuka' jantek xtuben ri Dios ri nikac'utuj chire. Tok nuben queri', jebel nikana' pa kánima y niketamaj achique ri ruc'amon chi nikaben (tatz'eta' c'a ri DyC 9:8-9). C'o jantek chuka' xtubij rija' chike chi tikoyobej na juba' richin nikac'ul ri achique kac'utun. Xabachique ri nubij ri Dios chike ronojel mul tok yojc'utun, rija' nuya' pe achique ri can utz vi xtuben chike.

C'o bey chuka' tok ri Dios yojruturusaj roma ri nuben jun chic vinek. C'o modo richin ri Ajaf nusiloj ri ránima jun kachibil, o jun kach'alal, o jun yukenel chupan ri K'ataj, o ri kate' katata', o jun chic vinek richin xkojruto'. Jun bey can jun achin tok juba' chic man nichap ri jech', xk'aj ri raken. C'ari' manek chic modo richin xuben na ri rujach'. Rija' xuc'utuj ak'anij chire ri Ajaf chi tuto'. Ja c'ari' tok jun rachibil ri achin ri' xapon riq'uin rija' y xubij chire chi ja rija' xtibano' ri rujach'. Que c'ari' xuturusaj ri Ajaf ri achin ri xch'o ak'anij riq'uin.

C'o bey chuka' tok ri Dios nuya' kuchuk'a' richin queri' can roj yojtquir nikaben ri achique nikac'utuj chi tubana' rija'. Roma c'ari', tok yojch'o ak'anij riq'uin ri Dios nic'atzin chi nikaben jampe' ri yojtquir richin chi nic'ulvachitej ri nikac'utuj chire ri Dios.



Tok nikatakej ri utzilej rutzijol richin ri Jesucristo y yojch'o ak'anij riq'uin ri Dios, janíla yojquicot. Que c'are' nubij ri Ajaf: Tach'utinirisaj c'a avi' y ri Ajaf Dios xcaruyukej chi ak'a', y xcaruturusaj roma ri lok'olej tak ach'oven (DyC 112:10).

¿La xtiyatej cami chike jantape' ri nikac'utuj? ¿Achiqwe roma?

Tasiq'uij c'a ruvech ri DyC 46:30.

¿Achiqwe roma nic'atzin chi nikac'utuj chire ri Dios chi tibanatej ri rurayibal rija'?

Tabij c'a chique ri vinek chi tiqubij achiqwe ri xquic'ulvachij rije' tok ri Ajaf xeruturusaj roma ri lok'olej quich'oven.

Tajiquiba' c'a chiquivech ri ch'aka' chic chi can nic'atzin vi ri lok'olej ch'oven.

Tabij c'a chique rije' chi janíla ruc'amon chi niquben ri lok'olej ch'oven tok e c'o quiq'uin ri qui familia, y tok niqitij quivay, y tok e c'o quiyon oc.

Tabixaj c'a ri bix rubini'an "Yalan Yatinvajo'."

#### CH'AKA' CHIC MOCAJ RI UTZ YE'ANIC'OJ

Santiago 1:5 (ri achiqwe nikac'utuj)

1 Tesalonicenses 5:17 y ri Salmos 55:17 y chuka ri 2 Nefi 32:9 (ri jampe' utz yojch'o ak'anij riq'uin ri Dios).

Mateo 6:6 y ri Alma 34:26 (acuchi yojch'o vi riq'uin ri Dios)

3 Nefi 19:6 y ri 1 Timoteo 4:15 y ri 3 Nefi 19:24 y chuka' ri DyC 46:30 (ri rubaniquil ri lok'olej ch'oven riq'uin ri Dios)

DyC 88:63-65 (achiqwe modo niturusex ri lok'olej ch'oven riq'uin ri Dios)

Moroni 10:3-5 y chuka' ri Alma 37:37 (achiqwe ri xtiyatej pe roma ri lok'olej ch'oven)

# RI PROFETA'I' RICHIN RI DIOS

"Kitzij c'a chi ri Ajaf Dios manjun xtuben, vi man ta xtu-k'alajirisaj ri evan retamabal chiquivech ri rusamajela', ri profeta'i'" (Amós 3:7).

Janíla chi vinek e c'o pa k'eku'm. Man quetaman ta ri achique nurayij ri Dios. Niqinimaj chi tz'apel chic ri caj y chi ri vinek xa e c'o quiyon oc chupan ri quic'ayeval. ¡Janíla e turusan ri Chojlaxela' chupan ri Ruq'uisibel tak K'ij! Ketaman chi ri Dios nich'o riq'uin ri K'ataj coma ri profeta'i'. Janíla yojquicot tok nikabixaj ri bix rubini'an "Matiox Kajaval Chi C'o Profeta."

¿Achique camí ri profeta ri yojruyukej vacami? ¿Achique ri ruchuk'a' y ri sipanic ya'on chire rija'? ¿Achique modo xtikato' rija'?


Tabixaj c'a ri bix rubini'an "Matiox Kajaval Chi C'o Profeta."

Tac'utuj c'a chire jun vinek chi tubij achique ri profeta, ri tz'etonek, y ri K'alajirisanel chupan ri K'ataj vacami yan.


## ¿ACHIQUE CAMI JUN PROFETA?

Jun profeta jari' jun achin ri cha'on roma ri Dios richin xtich'o pa rubi' ri Dios chuvech re ruvach'ulef. Chuka' nikabij *ya'ol lok'olej rutzijol* chire. Tok jun profeta nich'o pa rubi' ri Dios, jari' achi'el vi ta can ja ri Dios nich'o pe. Jun profeta c'o rusamaj. Rija' jun c'atzinel jiquibanel richin ri Cristo. Nujiquba' c'a chiquivech ch'aka' chic vinek chi ri Cristo can ja vi rija' ri Ruc'ajol ri Dios. Chuka' yerutijoj chire ri utzilej rutzijol. Nutzijoj ri kitzij y nusol rij ri ruch'abel ri Dios. Nubij chique ri man choj ta vinek chi titzolin c'a pe quic'u'x. Ri Ajaf nuk'alajirisaj ri rurayibal chuvech ri profeta y nuyukej richin queri' ri profeta xtuc'uj ri kabey roj. Jun profeta nitiquir nutz'et ri achique xtic'ulvachitej apon chikavech, richin queri' xkojrupixabaj c'a.


C'o modo chi jun profeta nuch'ec ri c'aslen riq'uin xaba-




Joseph Smith




Brigham Young




John Taylor




Wilford Woodruff




Lorenzo Snow




Joseph F. Smith



Heber J. Grant




George Albert Smith




David O. McKay



Joseph Fielding Smith



Harold B. Lee



Spencer W. Kimball

chique utzilej samaj. Utz vi rija' nisamej pa juyu' o vi rija' jun tijonel, jun aj banoy xajab, o jun ak'omanel. Utz vi rija' jun ri'j achin o vi man can ta ri'j. Ri profeta'i' richin ri ojer quicusan jun ruvech tziek. Ri profeta'i' richin vacami quicusan jun chic ruvech tziek. ¿Achique cami c'a modo richin xtiketamaj vi jun achin jun profeta? Jun kitzij profeta c'o chi nicha'ox pe roma ri Dios. Y c'o chi nicha'ox riq'uin ri kitzij aj chicajel uchuk'a'.

Ri Chojlaxela' chupan ri Ruq'uisibel tak K'ij niquinimaj chi ri Primera Presidencia, ri cablajuj apostoli', y ri Patriarca e profeta'i' checonojel. Man riq'uin vi ri', tok yojch'o chirij ri "profeta richin ri K'ataj" jac'a rija' ri Presidente ri K'ataj y chuka' ri Presidente ri Nimalaxel Aj Chicajel Uchuk'a'.

### **RI DIOS JANTAPE' E ROYON PE RI PROFETA'I' RICHIN CHI RIJE' YEQUIYUKEJ RI VINEK**

E c'o profeta'i' chuvech re ruvach'ulef, jampe' c'o pe ri Adán. Ri xquic'ulvachij ri profeta'i' nuya' kuchuk'a' y nuben chi yojquicot. Ri Moisés, ja rija' jun profeta ri c'o chupan ri Ojer Retal Tzij. Rija' xeruyukej c'a el ri ruvinak pa quik'a' ri aj Egipto, c'a pa ri ruvach'ulef sujun can. Rija' chuka' xerutz'ibaj ri nabey vo'o' vuj chupan ri Ojer Retal Tzij. Chuka' xerutz'ibaj can ri Lajuj Pixa'. Ri Nefi, ja rija' jun profeta ri c'o chupan ri Vuj richin ri Mormon. Rija' xel pe chupan ri Jerusalem y xuc'ovisaj ri nimalej ya' y xoka' pan América. Jari' xuben rija' 600 juna' tok c'a manjani talex pe ri Cristo. Ri nimalej achin ri' xerutz'ibaj q'uiy jebelilej tak tijonic ri yalan e c'atzinel chike. Ri tijonic ri' e tz'ibatel can chupan ri Vuj richin ri Mormon. Ri Juan aj Kasey Ya' xcha'ox can richin xuchojmirisaj apon re ruvach'ulef richin ri rupetebal ri Jesucristo. Ri José Smith, ja rija' jun profeta chupan ri kak'ij roj. Tok rija' c'a c'ajol na, ri Dios xroyoj pe chupan ri lok'olej samaj. Rija' xuk'axaj ri Vuj richin ri Mormon pa ruch'abel. Roma c'a rija', ri Dios xucamuluj chic pe ri Ruk'ataj chuvech re ruvach'ulef.

¿Achique jun profeta?

¿Achique ri ruchuk'a' jun profeta?

¿Achique nuben jun profeta?

¿Achique rusamaj ri profeta chupan ri K'ataj?

### **C'O JUN C'ASLIC PROFETA CHUVECH RE RUVACH'ULEF VACAMI**

C'o jun c'aslic profeta chuvech re ruvach'ulef vacami. Re

profeta re' ja rija' ri presidente richin ri Ruk'ataj ri Jesu-cristo quichin ri Chojlaxela' chupan ri Ruq'uisibel tak K'ij. Rija' c'o ruk'ij richin nuc'ul ri k'alajirisanic pa ruvi' chijun ri K'ataj. Rija' c'o riq'uin ri "jakbel richin ri ajavaren." Jare' nibec'ulun chikavech chi rija' nitiquir nuc'uaj rubey ri rubanic ri lok'olej takbel chupan ri K'ataj (tatz'eta' c'a ri Mateo 16:19). Manjun chic vinek, xaxe c'a ri profeta, c'o ruk'ij richin nuc'ul pe ri rurayibal ri Dios pa ruvi' ri K'ataj.

Nic'atzin chi nikaben achique ri nubij ri profeta chike. Jun profeta rubini'an Wilford Woodruff xubij chi jun profeta manjun bey nitiquir yojruyukej pa jun itzelilej bey. Que c'are' xubij:

"Ninbij chire ri Israel chi ri Ajaf manjun bey xtuya' ta k'ij chuve richin yixinvelesaj c'a el chupan rubeyal rija'. Y man xtuya' ta k'ij chire manjun achin ri c'o pa ruvi' re K'ataj re' richin queri' nuben. Man c'o ta chupan ri ruk'ijun ri Ajaf. Man que ta ri' ri runojibal ri Ajaf. Vi ta yin xtinrayij xtinben queri'; ri Ajaf xquinrelesaj c'a el chupan ri nusamaj. Y que c'a chuka' ri' xtuben ri Ajaf riq'uin xabachique achin ri nutij ruk'ij richin yerelesaj can ri calc'ual ri achi'a' chupan ri quisamaj y chuka' ri tzijonela' richin ri Dios. Quixruturusaj na c'a ri Dios."

Tabij chique ri vinaki' chi tiquilbij pe quibi' jampe' profeta'i' ri yetiquir.

Tabij chire jun vinek chi tutzijo pe ronojel ri retaman pa ruvi' ri profeta ri c'a q'ues na vacami.

## **NIC'ATZIN CHI NIKANIMAJ RI PROFETA RICHIN RI AJAF**

Janíla chi vinek man c'ayef ta chique richin yequinimaj ri profeta'i' richin ojer. Man riq'uin vi ri', más utz vi nikanimaj ri profeta ri q'ues vacami y nikatzekelbej rija'. Nikatzekej kak'a' richin nikak'alajirisaj chi nikanimaj ri presidente richin re K'ataj, chi kitzij rija' jun profeta, jun tz'etonej, y jun k'alajirisanel. ¿Achique cami xtikaben richin nikanimaj re profeta re'?

Nic'atzin chi yojch'o ak'anij riq'uin ri Dios pa ru cuenta ri profeta, roma ri rusamaj rija' yalan c'ayef. Xa romari' nic'atzin chire ri ruchuk'a' ri ya'on pe coma ri lok'olej quich'oven ri Chojlaxela'.

Nic'atzin chuka' chi nikasol rij ri ruch'abel rija'. C'o modo richin nikatz'et ruvech ri ruch'abel chupan ri vuj ri yeruben

pe ri K'ataj. C'o modo chuka' richin nikac'axaj ri nubij chupan ri nimalej molojri'il ri yeban pa Lago Salado. C'o bey chuka' c'o modo yojbe pa nimalej molojri'il ri niban chupan ri karuvach'ulef roj.

Nic'atzin chi yekatakej chi utzil conojel ri rutijonic rija'. Man utz ta vi yekatakej jun ca'i' oxi' rutijonic y xa yekaxutuj ri ch'aka' chic rutijonic ri más e c'ayef chike. Ri Ajaf xubij chike chi tikatakej c'a rutijonic ri ru profeta. Quere' c'a xubij:

Quixbiyin c'a chinuvech riq'uin ronojel lok'olej na'oj, y que'ivac'axaj conojel ri ruch'abel ri profeta y ri rupixa' ri xqueruya' chive tok yin xquenya' chire rija'.

Romari' riq'uin coch'onic y cukubabel c'u'x que'ic'ulu' c'a ri achique nubij rija', achi'el vi ta can ja yin ri yich'o (DyC 21:4-5).

Ri Ajaf manjun bey xtuya' k'ij richin ri presidente richin ri K'ataj xkojrutijoj chire ri achique man kitzij ta.

Catzijon c'a juba' chirij ri achique utz chi nikaben richin nikak'alajirisaj chi can yekanimaj vi ri profeta'í.

¿Achique ta c'a rubeyal richin niketamaj achique ri nubij ri profeta vacami'?

## **JANILA YOJTURUSEX TOK NIKANIMAJ RUTZIJ RI PROFETA**

Vi nikanimaj rutzij ri profeta, ri Ajaf quere' xtuben: Ri ruchi' ri xibalbay man xquixruch'ec ta. Y ri Ajaf Dios xtuyoel el chivech ri ruchuk'a' ri k'eku'm. Y xtuben chi xtisilon ri caj richin ri avutzil y richin ri ruc'ojlemal ri rubi' rija' (DyC 21:6).

Tok roj nikaben achique ri nubij ri profeta chike, ri Ajaf janíla yojruturusaj. Ri xuc'ulvachij ri Lorenzo Snow nuk'alajirisaj chikavech chi ri Dios yeruturusaj ri ruvinak tok niquinimaj rutzij. Ri Lorenzo Snow ja rija' ri ro' presidente richin re K'ataj chupan re ruq'uisibel tak k'ij re'. Chupan can ri k'ij tok c'a q'ues na rija', ri K'ataj man can ta c'o rupuak. Jari' c'ayef rubanon, roma manek rupuak richin nutoj ri ruc'as. C'a c'ari' más c'ayef xuben. Man xpe ta job. Ronojel chakirinek. Ri vinek janíla xquitij pokon. Ri profeta xch'o ak'anij riq'uin ri Ajaf y can xuc'utuj vi chire chi xeruto' ri vinek. C'a c'ari', jun k'ij ri profeta najin che tzijonen chupan jun nimalej molojri'il. Ja c'ari' tok ri Uxlabixel xch'o pa ránima ri profeta ri'. Ri profeta xubij chique

ri vinek chi can xtipe vi ri job vi rije' xtiquitoj c'a ri lajujita-kil. Xunataj ri xubij can ri Malaquías. Quere' c'a xubij: "Que'ic'ama' c'a pe ronojel ri lajujitakil chupan ri c'u-jay. . . y quinitojtobej c'a vacami, nicha' ri Ajaf quichin ri E Janíla. K'alaj c'ari' vi man xtinjek ta ri ruchi' ri caj y xtinchoxoxej c'a ka jun turusanic, xa c'a jampe' nipulisan" (Malaquías 3:10). Ri vinek xquinimaj rutzij ri profeta. C'a c'ari', xkaka pe ri job pa ruvi' ri quitico'n.

Nic'atzin chi ri kitzij Ruk'ataj ri Jesucristo can paban vi pa ruvi' jun profeta (Efésios 2:20). Janíla oj turusan vacami. C'o c'a jun kitzij profeta pa ruvi' ri K'ataj. Y ri Ajaf can nuk'alajirisaj vi ri rurayibal chuvech ri profeta ri'.

Tac'utuj chire jun chic vinek chi tutzijo na c'a ri achique xuc'ulvachij rija' tok xunimaj rutzij ri profeta. (Riq'uin juba' rija' xturusex tok xutoj ri lajujitakil, o tok xutakej ri Ch'abel richin Etamabel, o tok xutakej ri K'ij richin Uxlanibel, o tok xch'o ak'anij riq'uin ri Dios, o tok xmevayin.)

CH'AKA' CHIC MOCAJ RI UTZ YE'ANIC'OJ

Números 12:6 (ri Dios nich'o riq'uin ri ru profeta)

1 Samuel 9:9 (ri profeta rubini'an chuka' jun tz'etone)

Lucas 1:70 (ri Dios nich'o riq'uin ri profeta)

DyC 45:10,15 (ri Dios nich'o vacami achi'el xch'o chupan ri ojer tak k'ij)

1 Nefi 22:2 (ri Dios nich'o quiq'uin ri profeta' roma ri Uxlabixel)

DyC 68:3-5 (tok ri rusamajela' ri Ajaf yech'o achi'el ri nubij ri Uxlabixel pa cánima rije', ri niquibij jari' ri runojibal ri Ajaf, y ri rurayibal, y ri ruch'abel chuka')

DyC 107:65-67,91-92 (ri rusamaj ri presidente richin ri K'ataj)

DyC 43:1-7 (xaxe ri profeta c'o ruk'ij richin nuc'ul ri k'alajirisanic pa ruvi' ri K'ataj)